

# 2 John

## Harua Leta John Mo Ulia

### Leta Nike

John mo uli leta nike, matan vara tamlohi rasua la pa eři levosahia vara opoia enia hina aulu na mauri rasua. Mo vujangia vara opoia peresi na retivarařuhu la pa toho jara matea na mauri rasua. Mo vujangia vara Iesu enia tamlohi varařuhu matea. John vujangia vara enřa řa pa opoiopoiřa.

### Hin leta nike

1. Retioloolo (1-3)
  2. Opoia peresi na retivarařuhu (4-11)
  3. Isoiso reti (12-13)
- 

<sup>1</sup>Leta nike, enau patu tamlohi rasua sei John, na ulia isan hařai sei God mo viřonia peresi na natuna.<sup>a</sup> Enau peresi la haratu la levosahi na retivarařuhu, kama opoi kamim mo isoiso. <sup>2</sup>Kama opoi kamim mata retivarařuhu mo lo toho na mapuřa, ale i pa toho atu na pongi tui. <sup>3</sup>Moiso na usiusi vara God Tama peresi Natuna Iesu Křisto vara la pa řomřuhu hiniřa, ale la řomopoiřa, moiso vara la pa sileřa na nora tamata, na nora retivarařuhu, ale na nora opoia. <sup>4</sup>Enau na avulahi tavera matan na rongoa vara te natum la lo ooloolo na retivarařuhu sohen God Tama mo retileu hinia isařa moiso.

### Tamlohi Vujangi Haluhalu

<sup>5</sup>Vetasiku řuhuřuhu, na sopo uliuli vara a vereho vara o pa ooloolo hin te retileu paro hatea, mo vono, pani na lo uli haratu mo vereva tiroma moiso vara řa opoiopoiřa. <sup>6</sup>Opoia varařuhu enia vara řa vai na sava God

---

**a 1.1** *hařai peresi na natuna:* reti sei hařai peresi na natuna la vereva vara John mo lo řaramia vara hařai atu enia vao kalesia matea, ale natuna enia vao kalesia matan vao kalesia atu.

mo retileu hinia moiso, ale haratu ka rongoa moiso na tapulo rani, vara řa pa hahau hinia. <sup>7</sup>Matan ka levosahia vara tamlohi haluhalu matuvana la vano na varama moiso. La tamlohi haluhalu atu la retihalu vara Iesu Křisto mo sopo mai tamlohi varařuhu. La tamlohi haluhalu atu enira meresahi non Křisto. <sup>8</sup>Ha lo kilau matara! Mo sopo řuhu vara sava kama voko řilangi matana matamim i vano hina purongo, pani ha vaihitea vara ha lavi vevuhi na nomim otori isana. <sup>9</sup>Haratu řomina mo lo vano asau na hinau la vujangia hin Křisto moiso, ale mo sopo turu hinia, haratu natu, God Tama mo sopo lo toho peresia. Pani vara tea mo toho jejeu na sava hinau la vujangia moiso, God Tama peresi Natuna la pa lo toho peresia. <sup>10</sup>Vara tea i mai, pani mo lavi na vujangi tinapua, ha sopo tinařihia vara i unu na imamim, ha sopo silea na retiolooolo, <sup>11</sup>matan, vara haratu mo sile na retiolooolo isara, enia mo lo tuenira na nora hehe.

### Isoiso Retiolooolo

<sup>12</sup>Varařuhu na opoia vara a mele vere kamim na hinau matuvana, pani na sopo opoia vara a uli na leta purongo. I pa mele řuhu vara a mai vara enřa tolu řa pa sorasora, ale řa pa avulahi tavera matana. <sup>13</sup>Reti olooolo mo lo mai isamim mo tai isan la natun vetasimim nike God mo viřonia.